

文獻通考

二百二十六


經籍考



書門	類	號	函	架	冊
		二〇〇	二	五	一四〇

內閣文庫	漢書	號	冊	架
		六〇〇	一〇〇	八

內閣文庫	
番號	漢 600
冊數	140 (86)
函號	294 6

二百四十





文獻通考卷之二百二

淺草文庫

鄱陽馬端臨貴與著

經籍考

史職官

儀一卷續補一卷

陳氏曰後漢軍謀校尉汝南應劭仲遠撰按唐

志有漢官五卷漢官儀十卷今惟存此一卷載

三公官名及名姓州里而已其全書亡矣李埴

季允嘗續補一卷

漢官典儀一卷續補一卷

陳氏曰漢衛尉蔡質撰雜記官制及上書謁見

禮式隋志有漢官典職儀式二卷今存一卷李

埴亦補一卷其續者皆出於史中採拾

漢官舊儀三卷

陳氏曰漢議郎東海衛宏敬仲撰或云胡廣按宏本傳作漢舊儀四篇以載西京雜事不名漢官今此惟三卷而又有漢官之目未知果當時本書否唐志亦無官字舊在儀注類以其載官制為多故著於此

唐六典三十卷

晁氏曰唐玄宗撰李林甫張說等注以三公三師三省九寺五監十二衛等列其職司官佐叙其秩品以擬周禮雖不能悉行於世而諸司遵用殆將過半觀唐會要請事者往往援據以為

實韋述以為書雖成而竟不行過矣然識者謂自唐虞至周有六官而無寺監惟秦迄陳有寺監而無六官獨此書兼之故官皆複重也

陳氏曰題御撰李林甫等奉敕注按韋述集賢記注開元十年起居舍人陸堅被旨修六典上手寫白麻紙凡六條曰理教禮政刑事典令以類相從撰錄以進張說以其事委徐堅思之歷年未知所適又委母弟余欽韋述始以令式入六司象周禮六官之制其沿革並入注然用功艱難其後張九齡又以委咸二十六年奏草上至今在書院亦不行用今按新書百官志皆取此書即太宗貞觀六年所定官令也周官六職

視周禮六典已有邦土邦事之殊不可考證唐制內外官與周制迥然不同而強名六典可乎善乎范太史祖禹之言曰既有太尉司徒司空而又有尚書省是政出於二也既有尚書省而又又有九寺是政出於三也本朝裕陵好觀六典元豐官制盡用之中書造命門下審覆尚書奉行機事往往留滯上意亦頗以為悔云

中台志十卷

晁氏曰唐李筌撰起殷周迄隋唐纂輔相邪正之迹分皇王霸亂亡五類以為鑒戒唐相以李林甫陳希烈附皇道筌上元中自表天寶初追以綴名云

元和百司舉要二卷

陳氏曰唐宰相趙郡李吉甫弘憲撰首稱文班八十四司四百六十員武班二十六司一百八十員都計六百四十員末稱京文武官及府縣摠三千七百九十九員意者當時實數也

真負故事七卷

陳氏曰唐鳳閣舍人梁載言撰以唐官具負附之歷代事迹蓋後人職林職官分紀之類所從始也或稱職祖連珠崇文摠目又作真負事跡中興書目惟有七卷三卷缺

官品纂要十卷

陳氏曰唐樂安任戩撰以官品令為主而階職

勲爵隨品具列歷代沿革頗著其要戩舉進士
不第為此書當大和之丁未

御史臺記十二卷

晁氏曰唐韓琬撰載唐元初至開元御史臺中
制度故事以大夫中丞侍御史殿中監察主簿
錄事分門載次名氏行事著論一篇叙御史正
邪得失進擢誅滅之狀附卷末以為世戒

陳氏曰自唐初迄開元五年御史姓名行事及
官制沿革皆詳著之第八卷為琬著傳九卷以
後為右臺右臺創於武后廢於中宗歲月蓋不
久也未有雜說五十七條

御史臺故事三卷

陳氏曰唐朝集使洛州錄事參軍李構撰

集賢注記二卷

晁氏曰唐集賢學士韋述撰述在集賢四十年
天寶丙申撫置院始末及院中故事修撰書史
之次及孝明時學士名氏頗善叙事

南宮故事一卷

晁氏曰不題撰人韋述云開元中劉鄭蘭撰劉
儒者無著述方

翰林志一卷

晁氏曰唐李肇撰纂唐世翰林院中供奉儀則
制誥書詔之式其後云睿聖文武皇帝裂海岱
十二州為三道之歲蓋憲宗元和十四年也

承旨學士院記一卷

陳氏曰唐承旨河南元稹微之撰載承旨姓名自貞元二十一年鄭絀至元和十五年杜元穎并稹為十二人末又有李德裕李紳韋處厚三人蓋後人所益也

翰林學士記一卷

陳氏曰唐侍講學士萬年韋處厚德載撰

翰林院故事一卷

陳氏曰唐學士京兆韋執誼撰

翰林學士院舊規一卷

陳氏曰唐學士馮翊楊鉅文碩撰雜記院中事例及文書格式其祠祭祀版社稷宗廟上至天

地用伏惟尚享岳瀆而降只曰尚享此例今人皆莫之知則施之尊卑無別矣鉅宰相收之子其為學士在昭宗時

重修翰林壁記一卷

陳氏曰唐學士丁居晦撰開元二年也所記姓名迄于咸通而獨無天寶大曆學士為不可曉翰林盛事一卷

陳氏曰唐張著撰記唐朝儒臣美事凡三十八人

史館故事錄三卷

晁氏曰不題撰入姓名記史館雜分六門迄於五代李獻臣以為後周史官所著

陳氏曰六門曰叙事史例編修直筆曲筆而終之以雜錄末稱皇朝廣訓則是周朝史官也

翰林續志二卷

晁氏曰皇朝蘇易簡撰易簡在北門最承太宗
睽遇錄元和以後至國朝翰林故事以續李肇
之書

金坡遺事三卷

晁氏曰皇朝錢惟演載國朝禁林儀式事迹并
學士名氏文元公述真宗禮待儒臣三事附于
卷末

陳氏曰題名自建隆至天聖四年凡四十七人
自開元而下合三百一十五人其他典故視前

記詳矣

翰林雜志一卷

晁氏曰不題撰人輯唐書韋執誼故事元稹承
旨辟記韋來微新樓記杜元穎監院使記鄭璘
視草亭記并詩李宗諤題名記為一篇或云蘇
易簡子耆采其父翰林續志所遺附益之

陳氏曰蘇耆以其父遭遇恩禮之盛續於其後
名次續志

別書金坡遺事一卷

陳氏曰學士澶淵晁迥昭遠撰因錢惟演寄示
遺事別書真宗待遇恩禮三則於其後

翰苑雜記一卷

陳氏曰學士饒陽李宗諤昌武撰

掖垣叢志二卷

晁氏曰皇朝宋庠撰景祐中李宗諤始取國初掌誥名氏刻之于石自為紀序庠因之成此書王禹玉頗譏其疎略裴庭裕載舍人上事知印宰相壓角至今傳之為故事而庠書闕焉時為三字

掖垣續志一卷

晁氏曰不詳撰人續宋庠書迄元祐六年十一月陳軒試中書舍人

御史臺記五卷

陳氏曰不知何人作記本朝御史臺事至崇觀

間

嘉祐御史臺記五十卷

晁氏曰右皇朝馮潔已撰御史臺有記始於武后時姚庭筠其後韓琬韋述嗣有紀著嘉祐中王疇命潔已續之乃上自太祖建隆之元迄於嘉祐之末凡一百四年分門載其名氏行事凡三百餘人潔已拯之子也為叙傳兩篇述其父事且自叙立朝本末云與呂獻可傳欽之趙閱道相善而鄙韓玉汝周孟陽亦可槩見其為人

新御史臺記

晁氏曰右皇朝宋聖寵編崇寧中聖寵為察官

讀韓琬書咸用其規式所異者不為諸人立傳於儀制勅令格式為詳後人續至紹興九年御史臺彈奏格一卷

晁氏曰右政和中御史中丞蔣猷奏乞委屬官李弥大將本臺制勅令格式彈奏事件編成格目六月書成上之

陳氏宰相拜罷錄一卷

晁氏曰皇朝陳繹奉詔編起范質止曾公亮所載拜罷之由與實錄不同元祐史臣謂繹多出己意

陳氏樞府拜罷錄一卷

晁氏曰陳繹編起魏仁浦止宋綬

宰輔拜罷錄二十四卷

陳氏曰史館修撰范冲元長等撰起建隆元年止紹興六年宰相自范質至張浚執政自趙普至折彥質名記除授年月訓詞亦略叙在位本末于后

執政拜罷錄十卷

晁氏曰不題撰人自建隆元年止紹興九年按國朝以樞密院及參知政事為執政改官制後以左右丞兩省侍郎并密院為執政建炎三年後復用舊制云

國朝輔相年表一卷續一卷

陳氏曰同知太常禮院開封陳繹和叔撰自建

隆庚申迄治平丙午續自丁未迄紹興十四年
稱臣易記而不著姓當是李易也時方自給事
中奉祠其曰私題臣易之次者其書蓋未必上
而私續之耳自後接于嘉定則後人所益也

百官公卿表一百四十五卷

書錄解題作十五卷

晁氏曰皇朝司馬光君實等撰熙寧中光以翰
林學士兼史館修撰建議欲擬國史旁采異聞
叙宋興以來百官除拜劾漢書作表以便御覽
詔許之光請宋敏求同修及敏求卒又請趙彥
若繼之歷十二年書成

公自序曰唐初職事官有六省一臺九寺三監
十六衛十六府之屬其外又有勳官散官勳官

以賞戰多散官以褒勤舊故必折馘執俘然後
賜勳積資累考然後進階以其不可妄得故當
時以為榮及高宗東封武后預政欲求媚於衆
始有汎階自是品秩浸訛朱紫日繁矣肅宗之
後四方糜沸兵革不息財力屈竭勳官不足以
勸武功府庫不足以募戰士遂并職事官通用
為賞不復選材無所愛吝將帥出征者皆給空
名告身自開府至郎將聽臨事注名後又聽以
信牒授人有至異姓王者於是金帛重而官爵
輕矣或以大將軍告身纔易一醉其濫如此重
以藩方跋扈朝廷畏之窮極褒寵苟求姑息遂
有朝編卒伍暮擁節旄夕解提衣旦紆公衮者

矣流及五代等衰益紊三公端揆之貴施於軍
校衣紫執象之榮被於胥史名器之亂無此為
甚大宋受命承其餘弊方綱紀大基未暇釐正
故臺省寺監衛率之官止以辨班列之崇卑制
廩祿之厚薄多無職業其所謂官者乃古之爵
也所謂差遣者乃古之官也自餘功臣檢校官
散官階勳爵邑徒為煩文人不復貴凡朝廷所
以鼓舞羣倫緝熙庶績者曰官曰差遣曰職而
已於三者之中復有名同實異交錯難知又遷
徙去來常無虛日欲觀其大略故自建隆以來
文官知雜御史以上武官閤門使以上內臣押
班以上遷除黜免刪其煩冗存其要實以倫類

相從以先後相次為百官公卿表云

陳氏曰此書本入職官類以稽古錄序所謂建
隆接熙寧臣又著之於百官表即此書蓋與通
鑑相與表裏故著之編年類晁志有一百四十
二卷未詳

巽岩李氏序曰司馬光以熙寧二年建議請撰
宋興以來百官公卿表元豐四年表成凡十卷
詔送編修院世莫知其書何如也按光集有百
官公卿表摠序文官知雜御史以上武臣閤門
使以上內臣押班以上其遷出咸表見之初不
紀其卷第某家藏舊書有所謂百官公卿表者
七卷宰相參知政事樞密使副為一卷三師三

公左右僕射東宮三師三少賓客為一卷使相
宣徽節度留後觀察為一卷尚書丞郎給諫常
侍為一卷知開封府三司使學士舍人御史中
丞為一卷觀文資政端明樞密侍講讀學士為
一卷十二衛上將軍六軍統軍為一卷它官皆
止天禧惟宰相執政盡熙寧疑此表則光等所
修也然卷第比實錄所載尚缺其三倫類往往
顛倒分錯而摠序所稱閣門使及押班以上皆
絕不見豈三卷所缺即此表者而傳寫偶失之
歟若然則它官除拜俱當以元豐為限矣不應
自天禧以來遽絕筆但詳於宰相執政也且當
時修此表歷十二年乃成其久如是其疎略顧

如是是必不然當某家舊藏不得其純全耳某
能薄不堪世用頗願盡力於史學而本朝故事
尤切欣慕某既不自料故追繼光作將以昭明
祖宗之盛德大業使衆說咸會于一不敢鑿空
架虛熒惑視聽固當事謹其月日如古春秋
乃可傳信彼百官沿革公卿除拜皆事之最大
者也年表又安可缺因取舊七卷亟整治之續
編其年至宣和止元符以前皆從實錄治平而
上又參諸正史元符以後不免憑所傳聞國書
既非人間通有辛苦求得之脫簡誤字絕無他
本可校於先後次序諒多抵牾但憑所傳聞則
宣和距元符二十五六年茲不詳此皆其之罪

也改而正諸必有所待年表舊止七卷卷第不均今釐析之與其所續編者摠一百四十二卷凡所增益倫類具之目錄其故事則當別見續紀此不重列

按此序則溫公本書止十卷巽岩續編推而廣之為一百四十二卷晁氏所言乃巽岩續書非溫公本書也陳氏以為未詳者是未見巽岩之書然又以溫公之書為十五卷則不知其何所本也晁氏在巽岩之前安得見其書所謂一百四十五卷者決非巽岩之書也

職林二十卷

陳氏曰集賢院學士錢唐楊侃撰咸平二年所

序有胡昉者明道二年作後序增益事實七百四十五條而以新續標之侃端拱進士晚為知制誥避真宗舊諱更名大雅歐陽公其壻也集中有墓誌

輔弼名對四十卷目錄一卷

晁氏曰皇朝劉顏撰纂西漢迄五代羣臣應對之名者沒黯有天子置公卿輔弼之臣寧令從諛承意陷主不誼之言顏取以名其書天聖初馮元為侍講上之顏常為令坐事免由是詔復其官

職官分紀五十卷

陳氏曰富春孫逢吉彥同撰大抵本職抄而增

廣之條例精密事實詳備矣秦少游序之元祐七年也

官制學制各一卷

陳氏曰司馬光撰

唐職林三十卷

陳氏曰石埭尉惟揚馬永錫明叟撰以唐六典為主而附以新史所載事實頗采傳記歌詩之屬政和乙未天台左譽序

朝集院須知一卷

陳氏曰無名氏錄承平時京朝官得替回朝見禮式

皇宋館閣五卷

陳氏曰不著名氏所記止於元祐中興館閣書目云秘閣校理宋匪躬撰又云共八門元十五卷存十一卷今本止五卷不見門類前三卷又混而為一意未必全書也

蓬山志五卷

陳氏曰秘書少監劔川羅疇疇老撰凡十五門崇寧四年序

麟臺故事五卷

晁氏曰皇朝程俱撰紹興初復館職首入館纂集舊聞成十二篇予所藏書斷自南渡之前獨此書以載官制後事為詳故錄之
陳氏曰俱在承平時凡三入省故其見聞為詳

中興館閣錄十卷續十卷

陳氏曰秘書監天台陳騷叔進撰淳熙中騷長蓬山與同僚錄建炎以來事為此書李燾仁父為序續錄者後人因舊文增附之耳

巽岩李氏序曰上世官修其方故物不坻伏後世弗安厥官其方莫修職業因以放失夫方云者書也究其本原事迹及朝夕所當思營者悉書之法術具焉使居是官者奉以周旋雖百世可考爾周官三百六十官各有書小行人適四方則物為一書多至五書蓋古之人將有行也舉必及三惟始衷終依擬審諦則其設施斯可傳久六龍駐蹕臨安踰四十年三省樞密院制

度尚稽復舊惟三館秘閣歸然傑出非百司比首唐開元韋述所集記注元祐間宋宣獻之孫匪躬作館閣錄紹興改元程俱致道作麟臺故事朱氏皆祖韋氏而程氏故事并國初它則多闕蓋未知其有宋錄也惜最後四卷俄空焉余屢蒐采弗獲欲補又弗暇每每太息今所編集第端自建炎以來凡物巨細靡有脫遺視程氏誠當且密官修其方行古道者不當如是耶昏忘倦游喜見此書乃援筆為之序

翰林羣書三卷 翰林遺事一卷

陳氏曰學士承旨番易洪遵景巖撰自李肇而下十一家及年表中興後題名共為一書而以

其所錄遺事附其末摠為三卷遺事錄諸書所未及者洪氏父子兄弟四人入翰苑續史館故事一卷

陳氏曰著作佐郎曲阿洪興祖慶善撰記國朝史館事迹以續舊編

祖宗官制舊典三卷

陳氏曰直龍圖閣東萊蔡惇元道撰大略以為元豐用官階寄祿雖號正名而流品混淆爵位輕濫故以祖宗舊典與新制參稽互考而論其得失元道文忠公參政齊之姪孫而翰林學士延慶之子渡江卒於涪陵尹和靖焯嘗題其墓官制舊典正誤一卷

陳氏曰無名氏

國朝官制沿革一卷

陳氏曰黃琮元禮撰

職官記一卷

陳氏曰大理少卿蜀人張縝季長撰專載新舊遷轉之異亦以寄祿為未然也以上三家皆附蔡氏書後

官制新典十卷

陳氏曰熊克撰其書以元豐新制為主而元祐之略加通變崇政之恣為紛更皆具列焉

聖朝職略二十卷

陳氏曰熊克撰倣馬永易唐職林考其廢置因

革亦頗采故事摘舊制詰中語附焉其書猶草
創未成蓋應用之具也

續百官公卿表二十卷質疑十卷

陳氏曰兵部尚書永嘉蔡幼學行之撰續温公
舊書起熙寧至靖康質疑者考異也

職源五十卷

陳氏曰大理司直金華王益之行甫撰亦簡牘
應用之書也而專以今日見行官制為主蓋中
興以後於舊制多所併省故也

元輔表一卷

陳氏曰龔頤正撰專錄宰相不及執政

漢官考六卷

陳氏曰知金州清江徐筠孟堅撰以百官表官
制為主而紀傳及注家所載皆輯而錄之

漢官摠錄十卷

陳氏曰王益之撰大較亦如前書

縣法一卷

陳氏曰北京留守温陵呂惠卿吉甫撰曰法令
詞訟刑獄簿曆催科給納灾傷盜賊勸課教化
凡十門為縣之法備於此矣雖古今事殊而大
體不能越也惠卿小人之雄於才術固優然法
令居首而教化乃居其末不曰俗吏而謂之何
哉

縣務綱目二十卷

陳氏曰顓陽劉鵬撰凡四十四門四百七十餘事其說不止於作縣而事關縣務者為多焉元符庚辰序

作邑自箴十卷

陳氏曰李元弼持國撰政和丁酉序

中興百官題名五十卷

陳氏曰監察御史臨川何異同叔撰首卷為宰輔拜罷錄餘以次列之刻浙漕司其後以時增附渡江之初庶務草創諸司間有不可考者多缺之

齊齋臺諫論二卷

陳氏曰尚書雲川倪思正父撰嘉定初更化矯

韓氏用事之弊於是為論三篇言為之鷹犬者罪在臺諫已而其弊自若也則又為續論六篇言其情狀益精詳凡為臺諫之所以得所以失者至矣盡矣

金國官制一卷

陳氏曰虜雍偽大定年所攷切取唐及本朝舊制以文其腥膻之俗馬非馬驢非驢龜茲王所謂羸者耶

文獻通考卷之二百二

文獻通考卷之二百三

鄱陽馬端臨一貴與曰著

經籍考

史職官刑法

歷代宰相年表三十四卷

本壽仁父撰其自序略曰古之所謂相者

已初未嘗使它人參貳乎其間堯相舜舜相禹

禹相皋陶皋陶既沒乃相益湯相伊尹傳所謂

仲虺為湯左相者不足信也周家並建三公而

一公實兼冢宰故旦奭夾輔成王而誕保文武

受命者專屬之旦旦歸于豐奭乃專政蓋其名

三公其實一相耳自秦以降名實浸以兩失間

有瓌偉絕特負賢相之稱功烈赫然著見於一
時者亦必得君之專歷年之久而莫或參貳之
故也權出於一而莫或參貳之雖姦雄或得肆
肆其惡攘竊天下傾國敗家不可禁遏然而一
相之任終不可分者唐虞夏商之成法也彼徒
見趙高王莽曹操司馬懿其禍如此之酷也而
不察夫帝王之所以隆盛其為利蓋亦博哉不
能還治其本而反疑其末並列兼制使相牽引
而相遂失其職矣夫任相不獲其利而蒙其禍
是君之不明非相之權果不可使出於一也既
奪其職分其權則所謂相者特一大有司耳其
何以摠百官治萬事而亮天功耶凡相取其德

耳故曰惟尹躬暨湯咸有一德而舜禹皋陶之
胥命必孜孜以德為言彼誠知所本者歟本之
不知則其選用益雜而多端矣選用雜而多端
故其稱號亦顛倒錯亂無有定制或居其位而
不得聞其政或當軸秉鈞而身乃為它官名實
糾紛賢不肖溷淆其多或至十三四入而其少
猶不下四五輩古所謂相寧若此乎然而治亂
安危所係今猶古也其所以得相及所以失相
者要不可不知按諸舊史惟前漢及唐頗有譜
牒其它率皆不具脫略抵牾迷失本真乃旁搜
遠取推究前後悉用司馬遷經緯之法追為年
表起漢元訖周顯德昔之參機務執樞要者莫

不成在事有本末附見于下否則略之使其人
與其官皆相傳而不絕觀宰相之出處進退何
如而天下安危治亂在目中矣其足以補前代
之缺文揭當今之遠鑑乎合一千五百三十四
年離為三十四卷

天禧以來御史年表

李燾仁甫撰其自序曰御史法官也其責不專
於言而天禧選用則與諫官俱任言責臺雖有
等級也而義所當擊則卑者亦得徑行其權勢
氣力又出諫官上祖宗之聖筭神術備矣今亦
斷自天聖以來取丞雜三院姓名悉列之表若
其人必天子自擇而宰相優容之乃能有濟猶

諫官也

天禧以來諫官年表

李燾仁甫撰其自序略曰古者自公卿大夫士
至於工商莫不皆有言責輻湊並進而天子斟酌
焉未嘗以言責專付一官以言責專付一官則
則由漢武帝失之武帝誠不喜諫者初置諫大夫
猶未限負東京循舊弗改後乃浸微晉洎江
表絕不復置拓跋魏復置其負亦不可知高齊
緣孝經之文始有七人之限夫以天下之衆而
敢言者才七人尚足謂治耶恭惟祖宗明目達
聰協于虞舜任言責者不一天禧別置諫院禮
秩優異它官莫擬崇廣言路諫官御史權勢氣

力乃與宰相等蓋當時所用諫官御史必取天下第一流非學術才行俱備為一世所高者莫在此位或誤選試旋加汰斥言而當者曾不十年徑登台輔其名迹皆可考見嗚呼盛哉今斷自天禧置院以來作諫官年表并列古今之變為二說以附著之其一曰諫官必天子自擇而宰相勿與其二曰宰相雖不得與擇諫官必優容之乃克有濟

右職官

律文十二卷音義一卷

陳氏曰自魏李悝漢蕭何以來更三國六朝隋唐因革損益備矣本朝天聖中孫奭等撰音義

自名例至斷獄歷代異名皆著之
唐令三十卷式二十卷

陳氏曰唐開元宋璟蘇頲盧從愿等所刪定藝文志卷數同更同光天福校定至本朝淳化中右贊善大夫潘憲著作郎王洙校勘其篇目條例頗與今見行令式有不同者

南豐曾氏序曰唐令三十篇以常負定職官之任以府衛設師徒之備以口分末業為授田之法以租庸調為斂財役民之制雖未及三代之政然亦庶幾乎先王之意矣讀其書嘉其制度有庶幾乎古者而惜其不復行也故綴其大要可記者論之于此焉

刑統三十卷

晁氏曰皇朝竇儀以尚書判大理寺與法官蘇曉奚與張希護等修定古者議事以制使民不知所所爭也後世鑄刑書使民知所避也雖若不同所以為民之意則一然議事以制者委重於人鑄刑書者委重於法委重於人則上之人將輕重由心以虐其下委重於法則下之人將微於書以慢其上其為失也亦均要之以入行法不使偏重然後為得耳

陳氏曰初范質既相周建議律條繁廣輕重無擬特詔詳定號大周刑統凡二十一卷至是重加詳定建隆四年頒行

金科易覽三卷

晁氏曰崇文摠目有唐趙綽金科易覽一卷田氏書目有蕭渚金科易覽三卷當是綽初撰一卷緒刪改折之為三爾

疑獄三卷

晁氏曰晉和凝撰纂史傳決疑獄事其上卷疑書也下中卷疑子蒙所續

天聖編勅三十卷

晁氏曰天聖中宋庠龐籍受詔改修唐令參以今制而成凡二十一門官品一戶二祠三選舉四考課五軍防六衣服七儀制八鹵簿九公式十田十一賦十二倉庫十三廐牧十四關市十

五補亡十六疾醫十七獄官十八營繕十九喪
葬二十雜二十一

斷例四卷 元豐斷例六卷

晁氏曰皇朝王安石執政以後士大夫頗重意
律令此熙豐紹聖中法寺決獄比其六卷則元
豐中法寺所斷罪節文也

刑名斷例十卷

陳氏曰不著名氏以刑統勅令摠為一書惜猶
未備也

嘉祐驛令三卷

陳氏曰三司使梁國張方平安道等修定前一
卷為條貫勅後二卷為則例令官吏幫支驛券

衙官儉從之類皆擬此也

元豐廣案二百卷

晁氏曰皇朝元豐初置新科明法或類其所試
成此書

元豐刑部叙法通用一卷

陳氏曰末載申明至紹興淳熙以後

諸路將官通用勅二十卷

晁氏曰皇朝崇寧中修

刑統賦兩卷

晁氏曰皇朝傅霖撰或人為之注

決獄龜鑑二十卷

晁氏曰皇朝鄭克編次五代和凝有疑獄集近

時趙全有疑獄事類可未詳盡因增廣之依劉
向晏子春秋舉其綱要為之目錄分二十門
陳氏曰克因和氏之書分二十門推廣之凡二
百七十六條三百九十五事起鄭子產迄本朝
律心四卷

晁氏曰未詳撰人纂刑統綱要也

宣和軍馬司勅十三卷令一卷

陳氏曰宣和時所修

紹興勅十三卷令五十卷格卅卷式三十卷政和
以後赦十五卷

晁氏曰皇朝張守等紹興中被旨編修

紹興刑統申明一卷

陳氏曰開寶以來累朝訂正與刑統並行者

慶元勅十二卷令五十卷格三十卷式三十卷目
錄一百二十二卷隨勅申明十二卷摠二百五十
六卷

陳氏曰丞相豫章京鏜仲遠等慶元四年表上
國朝自建隆以來世有編勅每脩定號為新書
中興至此凡三修矣其有續降旨揮謂之後勅
以待它時脩入云

紹興貢舉法五十卷

陳氏曰丞相萬俟卨等紹興二十六年表上

紹興監學法二十六卷目錄二十五卷申明七卷
對修釐正條法四卷共六十二卷

陳氏曰宰相秦檜等紹興十三年表上
嘉泰條法事類八十卷

陳氏曰天台謝深甫子肅等嘉泰二年表上初
吏部七司有條法總類淳熙新書既成孝宗詔
倣七司體分門修纂別為一書以事類為名至
是以慶元新書修定攷降此書便於檢閱引用
惜乎不併及刑統也

嘉定吏部條法總類五十卷

陳氏曰嘉定中以開禧重修七司法并慶元海
行法在京通用法大宗正司法參定凡改正四
百六十餘條視淳熙總類增多十卷七年二月
攷行

役法撮要一百八十九卷

陳氏曰提舉編條宰相京鏜等慶元六年上自
紹興十七年正月以後至慶元五年七月以前
為三十五門又八十二小門門為一卷外為參
詳目錄等卷雖多而文甚少其書於州縣差役
極便於引用

右法令

文獻通考卷之二百三終

文獻通考卷之二百四

鄱陽馬端臨貴與著

經籍考

史地理

山海經十八卷

晁氏曰大禹製晉郭璞傳漢侍中奉車都尉劉秀校定表言禹別九州而益等類物善惡著此書皆聖賢之遺事古文明著者也天父嘗考之於書有曰長沙零陵鴈門皆郡縣名又自載禹鯀似後人因其名參益之

陳氏曰漢侍中奉車都尉臣秀所校秘書秀即劉歆也晉郭璞注按唐志二十三卷音二卷

今本錫山尤袤延之校定世傳禹益所作其事見吳越春秋曰禹東巡登南岳得金簡玉字通水之理遂行四瀆與益共謀所至使益疏而記之名山海經此其為說恢誕不典司馬遷曰言九州山川尚書近之矣至禹本紀山海經所書怪物余不敢言之也可謂名言孰曰多愛乎故尤跋明其非禹伯翳所作而以為先秦古書無疑然莫能名其何人也洪慶善補注楚辭引山海經淮南子以釋天問而朱晦翁則曰古今說天問者皆本此二書今以文意考之疑此二書本皆緣解天問而作此可以破千載之惑古今相傳既久姑以冠地理書之錄

山海圖經十卷

晁氏曰皇朝舒祖等撰雅仕江南韓熙載之門人也後入朝數預修書之選閩中刊行本或題曰張僧繇畫妄也

水經四十卷

晁氏曰漢桑欽撰欽成帝時人本經三卷後魏酈道元注史稱道元好學歷覽奇書撰注水經行於世

陳氏曰欽邯鄲書目以為漢人晁氏言成帝時人當有所據按唐志注或云郭璞撰又杜氏通典按水經晉郭璞注二卷後魏酈道元注四十卷皆不詳所撰者名氏亦不知何代之書佑謂二

子博瞻解釋固應精當然其經云濟水過壽張則前漢壽良縣光武更名又東北過臨濟則前漢狄縣安帝更名又云汾水過湖陸則前漢湖陵縣章帝更名又云汾水過河東郡永安則前漢瓠縣順帝更名故知順帝以後纂序也詳水經所作殊為詭誕全無憑據按後漢郡國志濟水王莽末因旱渠塞不復截河南過統順帝時所撰都不詳悉其餘可知景純注解又甚踈略亦為迂怪以其僻書人多不覩謂其審正未之精也

十道志十三卷

晁氏曰唐梁載言撰唐分天下為十道所載頗

詳博其書多稱咸通中沿革蓋唐末人也

陳氏曰其書廣記備言頗有可采載言不見於史未定為何朝人此書有大和以後沿革當是唐末人

唐十道圖一卷

陳氏曰唐宰相趙郡李吉甫弘憲撰首載州縣總數文武官負數俸料唐志云十卷今不分卷元和郡縣志四十卷

陳氏曰李吉甫撰自京兆至隴右凡四十七鎮篇首皆有圖今圖不存

太平寰宇志二百卷

晁氏曰皇朝樂史等撰太平興國中盡平諸國

天下一統史悉取自古山經地志考正訛謬纂
成此書上之

陳氏曰其書起自河南周于海外

圖經

晁氏曰皇朝李昉撰

九域志十卷

晁氏曰皇朝三存被旨刪定摠二十三路京府
四次府十州二百四十二軍三十七監四縣一
千一百三十五

陳氏曰存與曾肇李德芻等共刪定名元豐九
域志

輿地廣記三十八卷

晁氏曰皇朝歐陽忞纂自堯舜以來至于五代
地里沿革離合皆繫以今郡縣名或云無所謂
歐陽忞者特假名以行其書耳

陳氏曰政和中作其前三卷以今之郡縣系于
前代郡國之下其序曰以今州縣求於漢則為
郡以漢郡縣求於三代則為州三代之九州散
而為漢之六十餘郡又分而為今之三百州雖
或離或合不可討究而吾胸中則已了然矣漢
郡國一百三今云六十餘郡不可曉也忞當是
文忠族孫行名皆連心字

春秋地譜十二卷

晁氏曰皇朝楊湜編十三國地皆釋以今州縣

名并為圖於其後蓋常氏已嘗有此書而湜增廣焉

洽聞記三卷

晁氏曰唐鄭常撰記郡國舊事故附之地里類職方機要四十卷

晁氏曰不題撰人姓名序云本新舊九域志上擬歷代史旁取左氏水經通典且采舊聞參以小說點謬舉真紬成此書其間載政和間事蓋當時人也

地里指掌圖一卷

陳氏曰蜀人稅安禮撰元符中欲上之朝未及而卒書肆所刊皆不著名氏亦頗闕不備此蜀

本有涪右任慥序言之頗詳

歷代疆域志十卷

陳氏曰臨川布衣吳澥撰

輿地紀勝二百卷

陳氏曰知江寧縣金華王象之撰蓋以諸郡圖經節要略而山川景物碑刻詩詠粗無所遺行在宮闕官寺寔冠其首關河版圖之未復者猶不與焉眉山李說齋季允為之序

輿地圖十六卷

陳氏曰王象之撰紀勝逐州為卷圖逐路為卷其搜求亦勤至四蜀諸郡尤詳其兄觀之漕夔門時所得也

皇朝方域志二百卷

陳氏曰東陽布衣王希先撰凡前代謂之譜十
六譜為八十卷本朝謂之志為一百二十卷譜
叙當時事實而注以今之郡縣志述今日疆理
而系于古之州國古今參考譜志互見地理學
之詳明者無以過此矣嘉熙二年上于朝得永
免文解其父玲本建寧人己未進士試詞科不
中頗該洽希先述其遺藁以成此書

六合掌運圖一卷

晁氏曰不著名氏凡為四十四圖首列禹跡次
為中興後南北二境其後則諸邊關險要以及
虜地疆界亦著之

燕吳行役記

陳氏曰不著名氏大中九年崔鉉鎮淮南諸鎮
畢賀為此記者燕帥張允伸所遺僚佐道中記
所經行郡縣道里及事跡也

南行記三卷

晁氏曰王仁祐撰晉天福二年仁祐被命使高
季興記自汴至荆南道塗賦詠及飲宴倡酬殆
百餘篇

江行錄一卷

陳氏曰真州教授勾穎紹聖三年所序云太守
張公所修也張不著名自真而上直抵荆南自
岳而分旁徵衡來自湖口而別則東入鄱陽南

至廬陵程期岸次風雲占候時日吉凶與夫港
派灘磧磯泝莫不具載行江者賴焉

三輔黃圖三卷

晁氏曰按經籍志有黃圖一卷記三輔宮觀陵
廟明堂辟雍郊時等即此書也不著撰人姓名
其間頗引劉昭漢志然則出於梁陳間也

陳氏曰按唐志一卷今分上下卷載秦漢間宮
室苑囿甚詳多引用應劭漢書解而如淳顏師
古復引此書為據意漢魏間人所作然中興書
目以為崇文摠目及國史志不載疑非本書也
程氏雍錄辨之尤悉

長安志十卷

晁氏曰皇朝宋敏求撰敏求因韋氏所記搜采
羣臣罔有遺軼二紀而成凡府縣之政官尹之
職河渠關塞之類至于風俗物產宮室道街無
不詳備世稱其博趙若彥為之序

陳氏曰與河南志二書凡例微不同然漢唐舊
都遺事詳矣

河南志二十卷

晁氏曰宋敏求撰以韋述西京記為未備演之
為長安河南志司馬光為之序以為考之韋記
其詳不啻十餘倍開編繁然如指諸掌真博物
之書

關中記一卷

陳氏曰晉葛洪稚川撰所載殊簡略

長安圖記一卷

陳氏曰丞相汲公呂大防知永興軍以為正長安故圖著其說於上今信安郡有此圖而別錄其說為一篇

雍錄十卷

陳氏曰吏部尚書新安程大昌秦之撰周秦漢隋唐五代皆都雍故以名錄前史及黃圖宋志異同往往辨訂其辨黃圖有唐縣名且晉灼所引黃圖皆今書所無蓋唐人續成之非見漢事者

游城南記一卷

晁氏曰皇朝張禮撰禮秦人元祐中與陳明微自長安城南探竒訪古以抵樊川因次之為記洛陽伽藍記三卷

晁氏曰元魏羊銜之撰後魏遷都洛陽一時王公大夫多造佛寺或捨其私第為之故僧舍多為天下最銜之載其本末及事跡甚備

陳氏曰銜之以爾朱之亂城郭丘墟追述斯記

洛陽名園記一卷

晁氏曰皇朝李格非撰記洛中園圃自富鄭公以下十九所其論以為洛陽之盛衰為天下治亂之候園圃之興廢為洛陽盛衰之候則園記之作豈徒然哉公卿大夫忘天下治忽欲退享

此樂得乎唐之末路是也

陳氏曰格非禮部員外郎以不肯與編元祐奏章入黨籍國史文苑有李易安居士清照者其女也格非苦心為文而集不傳館中亦無有惟錫山尤氏有之文鑑僅存此跋蓋未嘗見其全集也

東京記

晁氏曰皇朝宋敏求編開封坊巷寺觀官廨私第所在及諸故實極精博

陳氏曰上卷為宮城周五里唐宣武節度治所建隆三年廣城之北隅用洛陽宮殿之制修之中卷為舊城周二十一里一百五十步唐汴州

城也號闕城亦曰裏城下卷為新城周四十八里二百三十三步周世宗所築羅城也號曰國城又曰外城三城之內宮殿官府坊巷第宅寺觀營房次第記之

東京夢華錄一卷

陳氏曰稱幽蘭居士孟元老撰元老不知何人少游京師晚值喪亂之後追述舊事兼及國家典祀里巷風俗以其首載京城官闕橋道坊曲尤詳故系之地理類

鄴中記一卷

陳氏曰不著名氏記自魏而下及僭偽都鄴者六家宮殿事迹按唐志有鄴都故事二卷肅代

時馬溫所作今書多引之

相臺志十二卷

晁氏曰皇朝韓琦欲編次未成郡守李琮命郡文學掾陳申之劾宋敏求河南志成此書

晉陽事跡雜記十卷

陳氏曰唐河東節度李璋纂序言十四卷唐志亦同今刪為十卷蓋治平中太原府所刻本也從莆田李氏借錄自南渡以來關河阻絕圖志泯亡得見一二僅存者猶足以發傷今思古之嘆然唐并州治晉陽太原二縣國初克復徙治陽曲而虛其故城二縣後皆并省則唐之故跡皆不復存矣

臨安志十五卷

陳氏曰府帥吳興周淙彥廣撰首卷為行在所於宮闕殿閣全不記載籍曰禁省嚴秘不敢明著其視宋次道東宮記何其大不侔其他沿革亦多䟽略然淙有才具其尹京開湖濬河皆有成績今城中河道通利民戶為脚船以濟行旅者蓋自此始

吳興雜錄七卷

陳氏曰唐湖州刺史張文規撰末載義興造茶及風物雜占甚詳文規張薦之後彥遠之子其為郡當會昌二年

吳興紀統十卷

陳氏曰攝湖州長史左文質撰分門別類古事頗詳序稱甲辰歲者本朝景德元年也

吳興志二十卷

陳氏曰樞密院編修郡人談鑰元時撰嘉泰元年也其為書草率未得為盡善

蘇州圖經六卷

陳氏曰翰林學士饒陽李宗諤昌武等撰景德四年詔以四方郡縣所上圖經刊修校定為一千五百六十六卷以大中祥符四年頒下今皆散亡館中僅存九十八卷余家所有惟蘇越黃三州刻本耳

吳郡圖經續記三卷

陳氏曰秘書省正字郡人朱長文伯原撰記祥符以後事亦頗補前志之缺遺長文吳中名士病廢不仕自號樂圃卒於元符元年

吳地記一卷

陳氏曰唐陸廣微撰郡人也多記古吳國事唐末有秀州天禧中始割嘉興縣置故此記合二郡為一

吳郡志五十卷

陳氏曰參政郡人范成大至能撰書始成未行而石湖沒有求附見某事而弗得者譁曰此非石湖筆也太守不能決藏其書學官然周益公為范墓碑述所著書目有焉及紹定初桐川李

壽朋儔老為守始取而刻之而書止於紹熙其
後事實俾寮屬用楮少孫史記例補成之趙南
塘履常作序訂其為石湖書不疑且謂郡士龔
頤正勝歲周南皆常薦所聞於公者而龔尤多
鎮江志三十卷

陳氏曰教授天台盧憲子章撰

新定志八卷

陳氏曰郡守東平董弁令升撰紹興己未也淳
熙甲辰武義陳公亮重修

嘉禾志五卷故事一卷

陳氏曰郡守毗陵張元成撰為書極草草

毗陵志十二卷

陳氏曰教授三山鄒補之撰

越州圖經九卷

陳氏曰李宗諤祥符所上也未有秘閣校理李
垂邵煥修及覆修名銜然則書成於衆手而宗
諤特提摠其凡耳

會稽志二十卷

陳氏曰通判吳興施宿武子郡人馮景中陸子
虛朱鼎王度等撰陸放翁為之序首稱禹會諸
侯而以思陵巡守陞府配之氣壯文雅蓋竒作
也嘉泰辛酉陸年已七十七矣未幾始落致仕
為史官至八十五歲乃終其筆力老而不衰於
此序見之

會稽續志八卷

陳氏曰梁國張湜撰續記辛酉後事而亦補前志之遺前志無進士題名此其尤不可遺者也

赤城志四十卷

陳氏曰國子司業郡人陳耆卿壽老撰其前為圖十有三

赤城續志八卷

陳氏曰郡人吳子良拾其所遺續載之

赤城三志四卷

陳氏曰郡人林表民逢吉撰紹定己丑冰壞城修治興築本末詳焉

四明志二十一卷

陳氏曰贛州錄事參軍廬陵羅璿修時胡槩仲方尚書為守璿其鄉人也

明越風物志七卷

晁氏曰皇朝姜嶼撰以明州本越地故曰明越又以郭璞注爾雅多引江東故詳載其風物云

永嘉譜二十四卷

陳氏曰禮部侍郎郡人曹叔遠器遠撰曰年譜地譜名譜人譜時紹熙三年太守宛陵孫楸屬

器遠裒集創為義例如此器遠庚戌進士蓋初第時也

永寧編十五卷

陳氏曰待制郡人陳謙益之撰漢分章安之東

甌鄉為永寧今永嘉四邑是也故以名編時嘉定九年留元剛茂潛為太守

東陽志十卷

陳氏曰樞密鄱陽洪遵景巖撰紹興二十四年為通判時所作

括蒼志十卷

陳氏曰教授曾賁撰乾道六年太守四明樓璩叔韞

括蒼續志一卷

陳氏曰郡人陳百朋撰

信安志十六卷

陳氏曰教授衛玠撰太守四明劉垢也實嘉定

己卯

信安續志二卷

陳氏曰教授葉汝明撰袁甫廣微紹定初也

文獻通考卷之二百四

文獻通考卷之二百五

鄱陽馬端臨貴與著

經籍考

史地理

建康志十卷

陳氏曰府帥史正志志道撰軋道五年

續建康志十卷

陳氏曰府帥吳琚居父以郡人朱舜庸所編詮次與前志並行時慶元六年

六朝事迹二卷

南朝宮苑記二卷

陳氏曰不知何人作記六朝故都事迹頗詳

姑孰志五卷

陳氏曰教授長樂林桶子長撰太守楊愿原仲也寔淳熙五年

新安志十卷

陳氏曰通判贛州郡人羅頤撰時淳熙二年太守則趙不悔也

秋浦志八卷

陳氏曰太守南昌胡兆乾道八年修

秋浦新志十六卷

陳氏曰三山三伯大幼學以前志缺陋重修時以便節攝部事端平丙申也

南康志八卷

陳氏曰郡守朱端章撰淳熙十二年
相汭新志二十卷

陳氏曰教授錢塘趙子直撰紹定五年也太守林棊

豫章職方乘三卷後乘十二卷

陳氏曰郡人洪芻駒父宣和己亥撰乘取晉乘為名後乘淳熙十一年太守程叔達序

尋陽志十二卷

陳氏曰迪功郎晁百揆元采撰淳熙二年太守開封曹訓為序

宜春志十卷

陳氏曰袁州教授南城童宗說太守李觀民也

宜春傳信錄三卷

晁氏曰皇朝羅誘述載其地古今人物及牧守政迹山川靈異之跡

袁州享惠廟錄一卷

晁氏曰皇朝張慤撰記仰山二神靈異之跡

盱江志十卷續十卷

陳氏曰郡守胡舜舉紹興戊寅俾郡人童宗說黃敷忠為之續志慶元五年三山陳岐修亦郡守也

富川志六卷

陳氏曰軍學教授括蒼潘廷立撰太守趙善宣紹熙四年也軍治永興本富川縣故名

南安志二十卷補遺一卷

陳氏曰太守方崧卿教授許開修廣陵志十二卷

陳氏曰教授三山鄭少魏江都尉會稽姚一謙撰紹熙元年太守鄭興裔也

楚州圖經二卷

陳氏曰教授雲川吳莘商卿撰太守毗陵錢之望大受時淳熙十三年

永陽志三十五卷

陳氏曰滁守林嶠命法曹龔惟蕃修

吳陵志十卷

陳氏曰不著名氏淳熙壬寅所修後三年乙巳

太守錢塘萬鍾元亨屬僚佐參正而刻之泰州
在唐為吳陵縣

高郵志三卷續修十卷

陳氏曰興化縣主簿孫祖義撰郡守趙不勳刻
之淳熙四五年間也其書在圖志中最為疏略
嘉定中守汪綱再修稍詳定矣

都梁志八卷續一卷

陳氏曰郡守霍篋教授周之瑞修紹熙元年也
續志嘉泰壬戌郡守耿與義序

合肥志四卷

陳氏曰合肥主簿唐錡撰郡守鄭興裔也時淳
熙十五年

同安志十卷

陳氏曰毗陵錢紳仲撰宣和五年太守曰曾
元禮未幾而有狄難至紹興十三年太守張彥
聲始取而刻之

歷陽志十卷

陳氏曰郡守九華程九萬鵬飛教授天台黃宜
達之撰慶元元年

黃州圖經四卷附錄一卷

陳氏曰李諤祥符所修舊經亦頗有後人附益
者郡守李訖又以近事為附錄焉訖參政邴漢
老之子也

齊安志二十卷

陳氏曰郡守呂昭問俾教授厲居正重修慶元已未也

濠梁志三卷

陳氏曰永嘉張季樗撰時嘉泰初元無為志三卷

陳氏曰教授宋宜之撰太守柴瑾為之序

襄陽志四十卷

郡守胸山高夔命教授吳興劉宗幙官上蔡任沔編纂為書既詳備而刊刻亦精緻圖志之佳者襄沔記三卷

陳氏曰唐吳從政撰剛宗懍荆楚歲時記盛弘之荊州記鄒閔甫楚國先賢傳習鑿齒襄陽者

舊傳郭仲產襄陽記鮑堅南雍州記集成此書其記襄漢事跡詳矣景龍中人自號栖閑子渚宮舊事十卷

晁氏曰唐知古撰自鬻熊至唐江陵君臣人物事迹史氏傳記所載者悉編次之

房州圖志三卷

陳氏曰郡守毗陵陳宇撰

義陽志八卷

陳氏曰郡守河南閔良臣撰紹熙二年也信陽軍唐申州所謂申光蔡吳元濟所據竭天下之力以取之者

長沙志五十二卷續志十一卷

陳氏曰郡守趙善俊以紹熙二年命教授褚孝錫等七人撰時止齋持漕相與考訂商略故序言當與長樂志並也續志不著名氏錄紹熙以後事

長沙風土碑一卷

陳氏曰唐潭州刺史河南張謂撰前有碑銘後有湘中記載事跡七十件

衡州圖經三卷

陳氏曰郡守三山孫德輿行之撰嘉定戊寅刻零陵志十卷

陳氏曰郡守徐自明嘉定己卯重修零陵記十五卷

晁氏曰皇朝陶岳撰永州地里志也今永州所部方三縣其所錄多連及數郡自序云以其皆零陵舊地故收之

春陵圖志十卷

陳氏曰教授臨江章穎茂憲撰淳熙六年太守趙汝誼

九疑考古二卷

陳氏曰道州崇道主簿吳致堯格甫撰取春陵志所紀而為詩以紀之宣和甲辰序

清湘志六卷

陳氏曰郡守永嘉陳峴壽南俾教授林瀛修嘉泰二年也

武昌志三十卷

陳氏曰郡守栝蒼王信成之命教授許中應等撰

武昌土俗編二卷

陳氏曰武昌令永嘉薛季宣撰記一縣之事頗詳紹興辛巳壬午間也其邑今為壽昌軍

鄭城志十二卷

陳氏曰教授傳岩撰慶元戊午太守李楫

岳陽志甲二卷乙三卷

陳氏曰甲集建安馬子嚴莊父乙集永嘉張聲道聲之所修皆郡守也

岳陽風土記一卷

陳氏曰宣德郎監商稅務建安范致明晦叔撰元符進士第二人仕至次對其在岳蓋謫官也辰州風土記六卷

陳氏曰教授縉雲田渭伯清撰隆興二年郡守徐彭年

成都古今記三十卷

晁氏曰皇朝趙抃編抃自慶曆至熙寧凡四入蜀知蜀事為詳撫其故實以類相從分百餘門時熙寧七年

續成都古今集記二十二卷

陳氏曰知府事王剛中居正撰紹興三十年余嘗手寫洛陽名園記而題其後曰晉王右軍聞

城都府有漢時講堂秦時城也池門屋樓觀慨然遠想欲一遊目其與周益州帖蓋數致意焉近時呂太史有感於宗少文卧遊之語凡昔人紀載入境之勝錄為一編其奉祠亳社也自以為譙沛真源恍然在目而究之太極嵩之崇福華之雲臺皆將卧遊之噫嘻弧矢四方之志高人達士之懷古今一也顧南北分裂蜀在境內雖遠患不往爾往則至矣毫充嵩華視蜀猶邇封也欲往其可得乎然則太史之情其可悲也已余近得此記手寫一通與東京記長安河南志夢華錄諸書並藏而時自覽焉是亦卧遊之意云耳于時歲在己丑蜀故無恙也後七年而

有虜禍秦漢故迹焚蕩無遺今其可見者惟此二記耳而板本亦不可復得矣嗚呼悲夫

劔南須知十卷

巽岩李氏曰宋如愚撰第一第二卷但編集舊史弃取或不倫第三第四第五第六凡四卷盡出唐樊綽蠻書第七卷以下乃如愚自為之文及所畫計策耳如熙寧買馬事誠西南要害異時或可補國史之闕云如愚眉山入游場屋有俊聲不第以死亦可哀者

蜀記一卷

晁氏曰皇朝張守約撰載孟昶初降至薨事

蜀記二卷

陳氏曰唐鄭暉撰雜記蜀事人物古跡寺觀之屬未詳何人

梁益志十卷

晁氏曰皇朝任弁撰天禧中游宦于成都以蜀記數家其言皆無據乃引書傳刊正其謬自為序

蜀三神祠碑文三卷

晁氏曰皇朝井虔編任四川漕日哀梓潼灌口射洪三神祠碑文板記成此書

嘉州志二卷

晁氏曰皇朝呂昌明以嘉州圖經增廣之

長樂志四十卷

陳氏曰府帥清源梁克家叔子淳熙九年序求嘉陳傅良君舉通判州事大略皆出其手

閩中記十卷

陳氏曰唐林諤撰本朝慶曆中有林世程者重修其兄世矩作序諤郡人養高不仕當大中時世程亦郡人也其言求嘉之亂中原仕族林黃陳鄭四姓先入閩可以證閩人皆稱光州固始之妄

建安志二十四卷續志一卷

陳氏曰刪定官郡人林光撰慶元四年郡守永嘉張叔椿俾僚屬成之續志嘉定十二年府學士人所錄

清源志七卷

陳氏曰通判州事永嘉戴溪肖望撰時慶元己未太守信安劉頴

延平志十卷

陳氏曰郡守新安胡舜舉汝士與郡人廖拱廖挺哀集時紹興庚辰也序言與盱江志並行蓋其為建昌守亦嘗修圖志

清漳新志十卷

陳氏曰司理參軍方杰撰嘉定六年太守趙汝諧蹈中也

鄞江志八卷

陳氏曰郡守古靈陳曄日華俾昭武士人李臯

為之時慶元戊午郡有鄞江溪故名

莆陽志十五卷

陳氏曰郡守趙彥勵懋訓紹興三年集郡士為之

武陽志十卷

陳氏曰教授葛元隲撰太守廖遲元達乾道六年也

晉江海物異名記三卷

陳氏曰秘書監莆田陳致雍撰致雍仕偽閩南唐後歸朝

廣州圖經二卷

陳氏曰教授王中行撰

南越志七卷

陳氏曰宋武康令吳興沈懷遠撰此五嶺諸書之最在前者也懷遠懷克之弟見宋書

番禺雜記一卷

陳氏曰攝南海主簿鄭熊撰國初人也莆田借李氏本錄之蓋承平時舊書末有河南少尹家藏六字不知何人也

番禺紀異五卷

晁氏曰宋馮拯撰拯淳化中謫知端州見嶺表鳥獸草木民俗物情舉異中原錄之為三十門凡三百事還朝上之

北戶雜記三卷

陳氏曰唐萬年縣尉段公路撰鄒平公之孫鄒

平文昌也

桂林志一卷

陳氏曰靜江教授江文叔編時乾道五年張維為帥撰次疏略刊刻草率亦不分卷次

桂林風土記一卷

陳氏曰唐融州刺史權知春州莫休符撰昭宗光化二年也

桂林虞衡志二卷

陳氏曰府帥吳郡范成大至能撰范自桂移蜀道中追記昔游

高涼志七卷

陳氏曰教授莆田劉棠撰太守春陵義太初嘉泰壬戌也

南行錄一卷

陳氏曰唐房千里撰太和中謫高州既北歸編山川物產之奇人民風俗之異為此書一名投荒雜錄

嶺表異錄三卷

陳氏曰唐廣州司馬劉恂撰昭宗時人

邕管雜記一卷

陳氏曰庫部員外郎范旻撰國初宰相質之子嶺南初平旻知邕州

嶺外代卷十卷

陳氏曰宋嘉周去非直夫撰去非癸未進士至郡倅所記皆廣西事

南方草木狀一卷

陳氏曰晉襄陽太守嵇含撰

黃岩志十六卷

陳氏曰知縣宋嘉蔡範甫撰嘉定甲申

旌川志八卷

陳氏曰知旌德縣歷陽李瞻伯山撰紹熙三年謝昌國為序

涇川志十三卷

陳氏曰知涇縣濡湏王棟叔永撰嘉定癸酉趙南塘序之初縣歲有水患庚午冬叔永改卜於

舊治之東二里曰留村

新吳志二卷

陳氏曰知奉新縣盱江張國均維之撰新吳縣舊名嘉定甲戌

樂清志十卷

陳氏曰縣令信安袁采君載撰

脩水志十卷

陳氏曰分寧宰徐筠撰

連川志十卷

陳氏曰知連江縣豫章陶武克之撰嘉定乙亥

文獻通考卷二百五十五

文獻通考卷之二百六

鄱陽馬端臨貴與著

經籍考

史地理時令

歷代宮殿名一卷

陳氏曰翰林承旨李昉等纂歷代及僭偽宮殿門闕樓觀園苑池館名無不畢錄

五岳諸山記一卷

陳氏曰無名氏多鄙誕不經

王屋山記一卷

陳氏曰唐乾符三年道士李歸一撰

華山記一卷

陳氏曰不知名氏
西湖古跡事實一卷

陳氏曰錢塘進士傅牧撰以楊蟠百詠增廣共
為一百八十三目紹興壬午序

青城山記一卷

晁氏曰偽蜀道士杜光庭賓聖撰集蜀山若水
在青城者悉本道家方士之言

峨眉志三卷

晁氏曰皇朝張開撰峨眉山名也隋開皇十三
年以名其邑奇勝冠三蜀郡守呂勤命開考圖
經及傳記石刻綴緝成書折為十四門宋白吳
中復詩文附于後

茅山記一卷

陳氏曰嘉祐六年句容令陳倩修

幙阜山記一卷

陳氏曰葛洪撰其山在豫章

豫章西山記一卷

陳氏曰贊皇李上文撰嘉祐丁酉歲

玉笥山記一卷

陳氏曰唐道士令狐晃堯撰山在新淦別本又
有南唐及本朝事後人所益也

湘中山水記三卷

晉耒陽羅含君章撰范陽盧拯注其書頗及隋
唐以後事則亦後人附益也

天台山記一卷

陳氏曰唐道士徐靈府撰元和中人也余假守臨海就使本道嘉熙丙申十月解郡符趨會稽治所道過之銳欲往遊會大雪不果改轅由驛道至今以為恨偶見此記錄之以寄卧遊之意顧渚山記一卷
陳氏曰唐陸羽鴻漸撰鄉邦不貢茶久矣遺跡未必存也

廬山記五卷

晁氏曰皇朝陳令舉舜俞撰先是劉煥嘗為記令舉因而增廣之又為俯視圖紀尋山先後之次云

陳氏曰劉煥凝之李常公擇皆為之序令舉熙寧中謫居所作

續廬山記四卷

陳氏曰南康守廣陵馬玕錄山中碑記之文以續前錄

九華拾遺一卷

陳氏曰山居劉放撰至和二年自序曰滕天章作新錄於前沈太守撰摠錄於後博考傳聞復得三十餘節

九華摠錄十八卷

陳氏曰邑人程太古撰哀集諸家所記萃為一編也

武夷山記一卷

陳氏曰杜光庭撰

霍山記一卷

陳氏曰知循州林湏撰山在循州境內

羅浮山記一卷

陳氏曰廬陵郭之美撰皇祐辛卯序

鴈山行記一卷

陳氏曰永嘉陳謙撰嘉定己巳游山直至絕頂得所謂鴈蕩者前人蓋未之識也然繼其後者亦未有聞焉

廬阜紀遊一卷

陳氏曰開封孫惟信季蕃撰嘗大雪登山至絕

頂盡得其景物之詳嘉定初年也惟信能為詩詞善談詭蓋嘗有官弃去不仕自號花翁遊江湖間人多愛之

何氏山莊次序本末一卷

陳氏曰尚書崇仁何異同叔撰其別墅曰三山小隱三山者浮石山岩石玲瓏山其實一也周回數里叙其景物序為此篇自號月湖標韻清絕如神仙中人膺高壽而終其山間今蕪廢矣

湘江論一卷

陳氏曰太常博士潘洞撰

海濤志一卷

陳氏曰唐竇叔蒙撰

太虛潮論一卷

陳氏曰永泰縣令錢栖業述末稱天祐六年

海潮圖論一卷

陳氏曰龍圖閣學士燕肅撰進

潮說一卷

陳氏曰知錢塘縣張尹房撰凡三篇

西南備邊錄十三卷

吳岩李氏曰唐李德裕撰今特存其第一卷而崇文摠目亦止載一卷豈嘉祐以前已亡逸乎德裕之深謀遠慮雖至今可用也而所存止此可惜哉

西南備邊志十二卷

陳氏曰嘉州進士鄧嘉猷撰紹興末犍為有蠻擾邊初莫知其何種族也已而有能別識其為虛恨蠻者時蜀邊久無事既去而朝廷憂之詔有司經度嘉猷取秦漢以來訖于本朝凡史傳所載蠻事皆著于篇時乾道中也其為志九為圖一

北邊備對六卷

陳氏曰程大昌撰淳熙中進禹貢圖孝廟因以北虜地里為問對以虜無定居無文史不敢強言紹熙退居追采自古中華北狄樞紐相關者條列其地而推言之名曰備對

南北攻守類考六十三卷

陳氏曰監進奏院趙善譽撰進以三國六朝攻守之變鑒古事以考今地每事為之圖

海外使程廣記三卷

陳氏曰南唐如京使章僚撰使高麗所記海道及其國山川事跡物產甚詳史虛白為作序已未十月蓋本朝開國前一歲也

大唐西域記十二卷

陳氏曰唐三藏法師玄奘譯大摠持寺僧辨機撰

南詔錄三卷

陳氏曰唐嶺南節度巡官徐雲虔撰乾符中邕州遣雲虔使南詔所作上卷記山川風俗後二

卷紀行及使事

至道雲南錄三卷

陳氏曰左侍禁知興化軍辛怡顯撰李順之亂餘黨有散入蠻中者怡顯往招安之繼馳賜蠻酋告勅而歸遂為此錄天禧四年自序或云此書妄也余在莆田視壁記無怡顯名字恐或然契丹疆宇圖一卷

陳氏曰不著名氏錄契丹諸夷地及中國所失地

遼四京記一卷

陳氏曰亦無名氏曰東京中京上京燕京

高麗圖經四十卷

陳氏曰奉議郎徐兢明叔撰宣和六年路允迪傳墨卿使高麗兢為之屬歸上此書物圖其形事為之說今所刊不復有圖矣兢鉉之後善篆書亦能畫嘗自題保大騎省世家宣和書學博士又自號自信居士

諸蕃志二卷

陳氏曰福建提舉市舶趙汝适記諸蕃國及物貨所出

夏小正傳四卷

陳氏曰漢戴德傳給事中山陰傅崧卿注此書本在大戴禮鄭玄注禮運夏時曰夏四時之書

也其存者有小正後入以大戴禮抄出別行崧卿以正文與傳相雜倣左氏經傳列正文其前時附以傳且為之注

荆楚歲時記四卷

晁氏曰梁宗慄撰其序云傳玄之朝會杜篤之上巳安仁秋興之叙君道娛蜡之述其屬辭則已洽其比事則未弘率為小說以錄荆楚歲時風物故事自元日至除日凡二十餘事

錦帶一卷

陳氏曰梁元帝撰比事儷語在法帖中章草月儀之類也

玉燭寶典十二卷

陳氏曰隋著作郎博陵杜臺卿少山撰以月令為主觸類而廣之博采諸書旁及時俗月為一卷頗號詳洽開皇中所上

歲華紀麗四卷

晁氏曰唐韓諤撰分四時十二月節序以事實為偶儷之句附著之

陳氏曰其書采經子史傳歲時事類聚而以儷語間之

保生月錄一卷

晁氏曰唐韋行規撰分十二月雜記每月攝養種藝祈禳之術李翱為之序

金谷園記一卷

陳氏曰題李邕撰館閣書目云唐中散大夫按邕字泰和江都人至北海太守世號李北海其父善注文選者也中散大夫唐文散階本傳不載不知書目別何所擬唐世不應有兩李邕也

秦中歲時記一卷

陳氏曰唐膳部郎中趙郡李綽撰綽別未見此擬中興書目云耳其序曰緬思庚子之歲荐周戊辰之年庚子唐廣明元年戊辰梁開平二年也又曰偶記昔年皇居舊事絕筆自嘆橫襟無涕然則唐之舊臣國亡之後感傷疇昔而為此書也按朱歲一紺珠集曾端伯類說載此書有杏園探花使端午扇市歲除儺公儺母及太和

八年無名子詩數事今皆無之豈別一書乎
咸鎬故事一卷

陳氏曰韋慎微撰其書與前大同小異竟不知
何人作也未卷却有神鬼大者號儼公母一語
按館閣書目秦中歲時記一名咸鎬歲時記
輦下歲時記一卷

晁氏曰唐李綽撰綽經黃巢之亂避地蠻隅偶
記秦地盛事傳之晚學

千金月令三卷

陳氏曰唐孫思邈撰

國朝時令十二卷

晁氏曰皇朝賈昌朝撰景祐初復禮記舊文其

唐月令別行三年詔昌朝與丁度李淑采國朝
律歷典禮百度昏曉中星祠祀配侑歲時施行
約唐月令定為時令一卷以備宣讀後昌朝注
為十二卷奏上頒行

陳氏曰唐因禮記舊文增損為禮記首篇天寶
中改名時令景祐初始命復禮記舊文其唐之
時令別為一篇遂命禮院修書官丁度等約唐
時令撰定為國朝時令以便宣讀蓋自唐以來
有明堂讀時令之禮也及昌朝解相印治郡五
臣皆已淪沒乃采經史諸書及祖宗詔令典式
為之集解而上之

兩朝藝文志詔因入閣讀時令問禮官五月朔

日夏至百官入閣可否皆曰五月朔朝會合唐
舊制雖是大祠比冬至圓丘禮成受賀在質明
後無嫌然擬易象月令及蔡邕有閉關靜事不
賀之說鄭康成擬樂緯春秋之說夏至有前殿
從入能作樂後漢嘗行其儀入閣讀令既屬嘉
禮在朔與假本無所礙惟夏至則於經義有妨
移用七月朔又罷寶元二年宋庠論入閣之非
兩制議入閣者是唐朝隻日紫宸殿受常朝儀
若隔日行禮頗為煩况今殿宇與舊不同乃止
慶曆七年復詔來年四月一日讀時令禮院約
定議注以通禮參用唐宣政殿朔望朝參儀草
定御文德殿皇帝服靴袍百官公服減正仗半

不設樂尋停皇祐初又詔立夏讀時令禮官卻
必請四時皆讀然亦不果

歲時雜詠

續歲時雜詠

宣獻公宋及其孫剛叔撰濟北晁無咎補之作
序曰余元豐六年六月遇畢公叔於京師公叔
言宋氏歲時詩曰歲時雜詠者蓋宣獻公所集唐
以前詩人之作髣髴具在公叔曰夫天地變化
其情至微有不可道以辭者四時之間氣候物
色俯仰輒異使一人言之雖其巧如簧恐不得
與造物者爭功於是雜衆言而觀之不亦可乎
宋氏故多賢而宣獻之孫曰剛叔尤篤志於學
不愧其先人又嘗集宋詩人之所為為續歲時

雜詠以成其祖之意蓋若干篇且詩之作患言不能稱物者以得之偏也嘗試丹青衆言憑几肆目於方尺之間而四時氣候物色慘舒榮槁所以過乎吾前者每觀每異其致亦足樂也因以其集屬補之為序補之復於公叔曰詩之亡久矣函詩七月其記日月星辰風雨霜露草木鳥獸之事盛矣屈原宋玉為離騷最近於詩而所以託物引類其感在四時可以慷慨而太息想見其忠潔剛叔於宋詩所取若此其亦有得於昔人之意乎宋有天下百年而詩之作中間尤盛蓋叔之所取小大成備今觀其錄一時顯人用是名世其尤宏傑者雖以磅礴天地呼吸

陰陽而成歲功可也其下者亦因所長而傳猶之一氣候至生者皆作灼然而華嚶然而鳴以謂天地之巧盡此矣

歲時雜記二卷

陳氏曰侍講東萊呂希哲原明撰希哲正獻公公著之子呂滎陽公在歷陽時與子孫講誦遇節日則休學者雜記風俗之舊然後圍坐飲酒以為樂久而成編承平舊事猶有考焉

周平園序曰本朝承平歲久斯民安生樂業凡遇節物隨時制宜雖有古有今或雅或鄙所在不同然上而朝廷次而郡國下逮民庶驩娛熙洽未嘗虛度則一也侍講呂公當全盛時食相

門之德既目擊舊禮又身歷外官四方風俗皆
得周知追記于冊殆無遺者惟上元一門多至
五十餘條百年積累之盛故家文獻之餘茲可
推矣慶元戊午秋公之玄孫仙遊邑大夫祖平
以示平園老叟周某竊有生晚不及見之歎云

右時令

文獻通考卷之二百六

